

Kalaallit Nunaanni nunami tamarmi nunalluunniit ilaani aalajangersimasuni aqqusinikkut angallannerup pisariaqartippagu angallatit motoorillit ilusaanik kiisalu atortuinik Kalaallit Nunaanni politimesteri immikkut akuersissuteqarluni piffissamik biilit quaannaveeqquteqarlutik angallannerannik sivitsuisinnaanissaa pillugu Naalagaaffeqatigiinni oqartussanut nalunaarutip atuuttut allanngortinnissaa pillugu attaveqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraatit)

Akissut

(Ineqarnermut, Attaveqarnermut Angallannernullu Naalakkersuisoq)

Siullermeerneqarnera

Andreas Uldum aalajangiiffigisassatut siunnersuut saqqummiussaa pillugu qutsavigaara.

Andreas Uldum-ip aalajangiiffigisassatut siunnersuummini tikkuagaatut biilit assakaasuinik quaannaveeqqutilinnik pisariaqanngitsunik atuinissap killilersorneqarnissaanut tunngavissat arlaqarput. Taakku inatsimmi atuuttumi tunngavilerneqarput, tassanilu allassimavoq, assakaasut quaannaveeqqutillit maajip ulluisa aallaqqaataanniit septembarip ulluisa 30-annut Kalaallit Nunaanni atoqqusaanngitsut. Assersuutigalugu assakaasut quaannaveeqqutillit aqqusernit qalliutaannik nungullartitsisarput, aammalu ikummatissamik atuneq annertunerulertarpoq, assakaasunullu nalinginnaasunut sanilliullutik bremsernermi unikkiartorfik takinerusarluni.

Paarlattuanik aqqusernit sermeqartillugit aputeqartillugilluunniit assakaasut quaannaveeqqutillit angallanermik pitsannguisarnerat annertuvoq. Misilittakkavut malillugit maajip ulluisa aallaqqaataanniit septembarip ulluisa 30-annut tamanna piffissap ilaani Kalaallit Nunaanni atuuttarpoq. Inatsimmi atuuttumi assakaasut quaannaveeqqutillit maajip ulluisa aallaqqaataanniit septembarip ulluisa 30-annut inerteqqutigineqarnerinik pisariaqartillugu saneqqutsisinnaanermik periarfissiisoqanngilaq. Taamaattumik pissutsit taamaatsillugit inatsisip atuuttup malitsinneqarnerani angallanermi isumannaassuseq ajornerulersinneqartussaavoq.

Taamatut isumaqarneq Kalaallit Nunaanni Politimestereqarfimmit isumaqatigineqarpoq.

Assakaasunik quaannaveeqqutilinnik pisariaqanngitsumik atuinissap killilersorneqarnissaanik kissaateqarneq tunngavigalugu Naalakkersuisut, Andreas Uldum-itulli, isumaqarput, piffissap assakaasunik quaannaveeqqutilinnik atuiiffiusussap tamarmiusup sivitsorneqarnissaa kissaatiginanngitsoq. Kisiannili Naalakkersuisut isumaqarput, sumiiffimmi pineqartumi pisariaqartillugu saneqqutsisinnaanermik akuersisarneq atorneqartariaqartoq.

Matuma siuliani taaneqartut tunngavigalugit inatsisip atuuttup allanngortinneqarnissaa pillugu Naalagaaffimmi oqartussaasut attaveqarfigineqarnissaanut, taamaalillunilu sumiiffimmi pineqartumi angallannerup isumannaassusaa eqqarsaatigalugu pisariaqartillugu piffissap

assakaasunik quaannaveequtilinnik atuiffiusussap sivitsornissaanut najukkani politiini oqartussaasut akuersissuteqarsinnaanissaannut Naalakkersuisut isumaqataapput.

Matuma siuliani taaneqartut tunngavigalugit siunnersuut akuerineqassasoq Naalakkersuisut inassutigaat.